

In niev cudisch da poesias:

”Paun cucu” – da Vic Hendry

Sin ch'ei fa primavera cumpara in'edizium dalla Romania cun poesias da Vic Hendry. Tgei, il Vic fa ussa poesia? Il Vic, ch'ei bein enconuschents al lectur sursilvan da ses romans historics, ses raquens, diaris e historias cuortas. Ed ussa pia poesias! E Vic, il raquintader, drova buca bia plaids e spazi per schar saver nus quei ch'el vul palesar a nus en poesia.

Presentau in vast mund

En 81 poesias presenta el a nus in vast mund. Mintgaton sesarva quei a nus sil fiat e mintgaton stuein nus sedar breigia ed interpretar ses maletgs. Denton, mei ha ei fatg surstar con bein ch'igl autur relata a nus tut quei che fa en el poesia, tut quei che fa per el melodia, che daventa canzun e mintgaton schizun oraziun. Tgi che legia veramein cun atenziun quella rimnada da poesias da duas stagiuns e capescha era ellas, vegn a capir in tschuat dalla veta digl autur e sias staziuns dalla veta. En sias poesias reviva e resenta el numnadamein cun slontsch e virtuosidad in'entira veta. Ed el fa quei sc'in settaballester indian: el seconcentrescha, pren en mira, visescha e lai curdar paliet per paliet. Jeu sai buca daco: quei maletg digl art da tir cugl artg ed il Vic sco «um indian» han adina persecitau mei, legend sias poesias. E buca mo lu. Era tier las sentupadas cugl autur hai jeu viu avon mei in «indian»: sperts, agils, lingiers, eglia da sprer, in sisavel senn e tschels tschun adina sensibilisai. L'agilitad dil Vic ei corporala e spirtala. E quei dat allas poesias modernitad, in'apparenza da giuven. Mintgaton tradeschan certs patratgs denton era la madirezia, stauncladad e sabientscha. E lu sentan ins ch'igl autur ei staunchels e seprepara bein ir a ruaus. Jeu less nuota far ord il Vic in guru; plitost aunc in profet. In guru ei numnadamein in carstgaun che' vul ch'ins suondi el sco apostels. E quei ei ualvess l'intenziun dil scriver dil Vic. El dat semplamein perdetga da tut quei ch'el vesa, senta patratga, gusta e tucca. E quei ei buca pauc. Ed orda tut quei ha el fatg poesia.

Tschun capetels

Il cudisch ei partius en en tschun capetels:

Sclarescha neuaden

Teniu car

Ei suera

Ei trai

Fan tiara

Sclarescha neuaden: Quei ei in giavisch, in clom alla natira, era in laud al scaffiment. Glisch sclarescha noss'olma e radis suleagl scauldand e legran tut ils carstgauns. Aschi ditg sco ei «sclarescha neuaden» essan nus aunc buca piars, dat ei aunc cunfiert e legherment e nus sentin adina puspei con biala che la veta sa esser.

Teniu car: Carezia dalla mumma, bufatg, priu sin bratsch, mess en uorden, buca «fatg» l'amur alla sperta, alla bahuta, alla modern, mobein cun precauziun, priu en bratsch adina puspei, cun quitau e perseveranza. Era sche la moda da tener car dil Vic ei valeivla gia per ils emprems carstgauns ei la fuorma da poesia d'amur dil Vic en mes egls fetg moderna.

Ei suera: Da tgei suera ei? Da carstgauns. Ils carstgauns ein fallibels, amabels, malgests, fascinonts, honcelis, reclis, malgests, lungurus: els ein spir mendas, plein qualitads: divinas e demonicas. E tut quei tef da carstgaun fatschenta il Vic. El auda, freda, tucca e schagia: reflectescha, metta en poesia e dat siu commentari. Ed ins senta sias poesias ch'el fa art e part dalla veta dils concarstgauns cun tgierp ed olma, cun spért allert e plema gita.

Ei trai: Secapescha ch'ei trai onzvalt. Ei dat viaden in'aria criua. Nus essan suttaposts ad in current d'aria e meinsvalt a nauscha critica. Pil Vic munta quei: Ei dat ina massa scuidonza denter nus. E mintgaton eis ei bunamein da sedesperar. Denton mo bunamein. Lu han ins il sentiment ch'ei tragi schi da rudien ch'ins survegni malcostas, e lu: sclarescha ei puspei neuaden e nus sentin ch'ins tegn car nus.

Fan tiara: Cu nus vegnin vegls e survegnin fauldas, cu nus vein l'impressiun da daventar macorts e trits ed ils dents van alla malura, sentin nus tuts che nus fagein tiara. Lu daventein nus cunscients ch'il

carstgaun ei puorla e daventa puspei puorla. En quei capetel, nua ch'igl autur daventa fetg pensivs, senza denton curdar en malenconia e depressiun, daventan sias poseias per mei bunamein oraziuns. Il carstgaun madir daventa sabis, accepta tut, veta, malsogna e mort, denton oravontut eis el engrazieivels visavi la veta: mo aunc in onn, mo aunc in di. Ina gada aunc schar, dar viaden da camifo, mo aunc ina gada tener car e vegnir tenius car e lu adia amitgs, parents ed enconuschents. Lu mira il Vic aunc ina davosa gada anavos e di: igl ei stau bi, jeu hai viviu bugen, era sch'igl ei stau mintgaton dir da carpar: stgavo jeu sun da prescha, jeu stoi ir ussa, schei mei cumbien ed engraziel per tut. El sa denton era buca prender cumiau da malhofli. Na, el resta tochen alla fin honzelis sco adina, era sch'el giavischass mintgaton ch'ei targess meins e ch'ei sclaressi aunc pli fetg viaden, e che nus tenessien in l'auter car.....

Luzian Spescha

GR 23-02-1990